

欽定剿平三省邪匪方略

正編

五  
三



欽定剿平三省邪匪方略正編卷一百十二  
己未年

七月二十八日

甲申

伯麟奏言本月二十三日准

勒保咨稱川省大兵雲集支用浩繁現已奏請

撥銀五百萬兩並陳明請於山西藩庫暫借銀

四五十萬兩迅速委員解川接濟仍俟軍餉過

晉照數截留還欵

臣

隨飭司在藩庫存貯鹽課

等項動銀四十萬兩因尙未奉有

諭旨不敢冒昧起解除飭趕緊裝鞘一面預備外其

應否就近撥給之處理合請

旨遵行如蒙

俞允臣查現在晉省庫貯不致乏用將來京餉過晉

可毋庸截留應請

勅部卽於勒保奏准撥赴川省軍餉銀內少撥銀四

十萬兩扣留存部以抵山西借撥之數則欵項

不致混淆運送亦可節省奏入

上命軍機大臣傳諭伯麟曰晉省庫貯旣屬敷用所  
有此項鹽課等款銀四十萬兩自應解川應用着  
伯麟卽遴委妥員解往川省面交署總督魁倫點  
收至由京撥川餉銀前已諭令魁倫察核應需若  
干據實覆奏再行酌撥此時尙無確數統俟魁倫  
奏到後所有經過沿途應行預備之處再諭知伯

麟備辦也

同日

上諭內閣曰本年正月

太上皇帝龍馭上賓薄海內外無不同深哀愴凡在外

藩遠服如朝鮮國王李祘接奉

遺詔卽專遣使臣馳赴闕廷進香致祭舉哀盡禮安南

國王阮光纘遣使敬闕虔修箋表陳述愀怵繕備

儀物懇求瞻謁

梓宮敬伸奠獻又土爾扈特親王策凌烏巴什等一聞  
太上皇帝升遐之信卽傳齊喇嘛念經併欲公同捐銀  
遣使送京於旃檀寺唵誦經典策凌烏巴什又請  
令伊子一人出家爲喇嘛用伸報答又哈薩克王  
杭霍卓等懇請照依駐劄大臣儀注持服穿孝不  
敢剃髮又霍罕伯克那爾巴圖亦專人進表懇求

叩謁

凡筵又廓爾喀王拉特納巴圖爾亦具表呈進土物懇

請穿孝虔修佛事此外臚章哀籲者不一而足抒

誠追慕悉皆出自本心而四十九旗蒙古喀爾喀

皆親至京城哀號瞻戀盡哀盡禮更不待言此固

由

太上皇帝涵濡怙冒懷德畏威是以奔赴哀號爭先恐



後但外藩等平時每遇年節來京瞻覲例止筵宴  
賞賚用示綏懷非如內地百姓累世久承

恩澤者比而該國王伯克等尙能萬里銜哀肅將誠慕

然則爲百姓者更當如何感戀乎我朝自開國以

來

列祖

列宗厚澤深仁惠鮮懷保凡茲黎庶自其祖父食毛踐

土百有餘年罔不共仰

生成安居樂業迨我

皇考御宇勤求政治仁育羣生六十餘年有如一曰而

惠愛黎元施恩稠渥非惟近古未有洵爲超越從

前普免地丁錢糧者五次普免漕糧者三次偶遇

水旱偏災發帑賑卹隨時蠲緩者更以億萬計迨

春秋日高勤政愛民猶日孜孜不稍暇逸卽間有一二

貪黷之員封疆大吏因

聖壽彌高不敢煩勞陳瀆雖亦在所不免然自朕親政

以來力加振飭除隨案懲辦外其虐民尤甚者如

常丹葵胡齊崙等一經訪聞糾劾立即革職抄拏

近又諭令各督撫整飭吏治激濁揚清保薦循良

叅辦貪酷有何民瘼不能上聞而必欲相率爲亂

乎卽或因不肖官吏朘削難堪亦何難赴訴有司

聽候審理安知冤抑終不得伸覆盆不復見日耶  
乃陝楚四川等省邪教匪黨嘯聚山林刼掠焚燒  
事經數載朕猶念其激變有因凡此盜兵之徒皆  
吾赤子節次頒發諭旨勸示招徠不但被賊裹脅  
之人有能自行投出者卽飭地方官妥爲收卹俾  
各安生卽賊首賊目如有歸命投誠者亦當施浩  
蕩之恩開自新之路該匪等具有人心豈竟毫無

感動甚至聞知

太上皇帝奄棄臣民亦全無哀痛似此阻兵構亂頑梗

難馴豈我

皇考六十年來愛養中夏黎元之意耶特此再行剴切

宣諭並着豫楚川陝各督撫將此旨刊刻謄黃通

行曉示該匪等務須激發天良幡然改悔及早解

散勉爲良民倘經此番勸諭之後尙敢恃衆負隅

嘯羣傲擾則是始終怙惡自外生成朕何難廣集  
天下兵力滅此小醜彼時卽欲自行投出斷難由  
貸當無分玉石悉予駢誅事到臨期噬臍何及將  
此通諭知之

臣

等謹案愛敬之良盡人同具所以惑於邪  
教自作不靖者總由山野之氓蚩愚無識始  
倡亂於一二匪徒繼且利誘威驅以致嘯聚

日多猝難解散我

皇上詰奸鋤暴復蒙

憫念昏頑剿撫兼施

綸音疊沛黜貪墨而舉循良

塵瘡痍而大蠲賜愛民之政罔不徧舉而梗化之徒

執迷弗悟乃

聖德如天猶不忍概予誅薙

諭以朝廷積累之恩

示以薄海歸誠之義此而不知悔罪自新其亦自絕

於

光天化日之燾育者矣

二十九日

乙酉

松筠奏言平利賊匪時至孟石嶺

附近窺伺其意總欲乘虛北竄掠食經慶溥分

撥官兵嚴堵温承忠亦添派鄉勇在毛家壩嚴



防賊匪遂翻藍家山至八仙河由拗崖一帶竄

回川境其紫陽一路由西鄉竄來之冉添元等

匪經柯藩派都司儲士雄在朱溪河堵剿柯藩

親督兵勇截殺斃賊一百餘人投出難民數十

名均交紫陽縣知縣蔣志坦訊明酌給盤費回

籍現在西鄉境內各卡隘防堵嚴密所有牟化

龍苟文明鮮大川各股賊匪不能北竄均陸續

奔回大竹河惟冉添元一股在紫陽被柯藩擊  
退遂由草壩繞回塔壩河竄至沙田壩近卡處

所經王文雄抽調各卡兵勇派守備劉耀德楊

光時趕赴箭桿山親率叅將鮑貴都司梁煥繼

進賊匪已至景家坪劉耀德等趕到賊匪俱入

林箐王文雄令梁煥帶前隊兵勇趕出南面林

口鎗礮齊放賊衆抵死不退王文雄復率後隊

趕至賊匪分股繞向西首欲抄我後路劉耀德  
楊光時等急往迎截賊匪又分出一股由東首  
林內衝來王文燧率鮑貴等帶兵截擊糧員州  
判張聖佑亦帶鄉勇協剿三路併力殺賊一百  
餘名我兵乘勝追殺沿途又殺賊一百餘名生  
擒三十餘名賊匪奔回皮貨舖次日復分一股  
千餘人由黃石坎捷徑至羅針壩其大夥又至

沙田壩王文雄急調防守堰口之署遊擊關勝

保趕往堵截親帶將弁兵勇在景家坪迎擊殺

賊一百餘名搶獲大礮一位刀矛七十餘件餘

匪仍折回皮貨舖查大竹河係四川太平地方

皮貨舖係西鄉邊界與太平緊相接壤此時平

利紫陽境內均無賊匪西鄉僅有一股陝省南

界漸次肅清惟是賊蹤無定難保其不復北竄

自西鄉至平利一帶千餘里臣已札飭王文雄

慶溥柯藩溫承惠等鼓勵鄉勇加意防堵賊近  
則出剿俟張漢潮一股殲除騰出勝兵全赴南  
界分路剿殺庶可望其蕝事查張漢潮一股現  
由五郎竄至孝義漸近商州明亮已先到商州  
正可迎頭截剿賊匪若折回西奔慶成永保由  
大峪口入山從西向東又可遏其來路與明亮

夾擊現在恒瑞帶兵剿辦藍號餘匪節經殲戮  
勢已窮蹙所有投出被裹難民均已賞給盤費  
各令回籍詢得所剩賊匪無多盡向寧羌大山  
老林中逃竄恒瑞分兵剿捕一俟辦理完妥卽  
可帶兵由城固洋縣一帶自南而北合剿張逆  
臣已督催各路糧臺州縣就近分投運送糧餉  
軍火源源接濟勿致稍有缺乏其撒拉爾回兵

應否調用 臣 卽欽遵札商明亮慶成永保等如

有必須檄調卽當一面札調一面奏

聞如須派添阿拉善兵自應奏明請

旨勅下旺親班巴爾遵辦再查藍白兩號賊匪初報

皆指爲張映祥嗣 臣 抵甘省細加探訪並獲賊

訊供白號賊首係楊開甲張金奎藍號賊首係

張士虎弟兄並無張映祥其人五月杪白號賊

匪竄至徽縣臣恐其由兩當鳳縣東趨與張漢

潮合夥因卽札知永保遏其東竄之路賊匪遂

於六月初一日由白水江上游南竄畧陽沔縣

寧羗一帶入川彼時永保移咨明亮不無輾轉

明亮未知其詳仍指爲張映祥一股竄入徽縣

兩當具奏致塵

聖慮現在白號賊匪已在川省通江南江境內總兵



德齡副將褚大榮及遊擊楊國林等帶兵剿辦  
其藍號餘匪折回陝境現有恒瑞帶兵截擊此  
外實無另有張映祥一股賊匪

松筠又奏言

臣

欽奉

諭旨駐劄漢中督辦糧餉查陝西自嘉慶元年以來  
共請餉銀一千一百萬兩此次蒙

恩復發部餉銀一百五十萬兩交

臣

辦理自應將舊

項截清起止月日先行核銷以免混淆臣已按

例開明條款行知各路糧臺各營糧員並各州

縣照式分欸開造送西安軍需局由馬慧裕台

斐音核對清楚彙呈臣處逐欸覆核俟賚到一

案卽行核實題銷其有例外濫行支應及價值

浮多數目不實均卽照例刪減查明分別追賠

總期實用實銷卽或軍行緊急偶有萬不得已

通融之項亦當確查實在情形聲明原委隨案

請

旨定奪斷不令滋弊混至新撥餉銀已全數解到西

安<sub>臣</sub>將西安軍需局移設漢中提取餉銀一半

飭委現在漢中道府及新到候補道府分段專

責經理所有各路糧臺各營糧員各州縣具領

之項俱由<sub>臣</sub>處核定飭局發給每十日開摺彙

呈其每日支用散數亦令按旬開摺呈局彙送

臣

處核銷其一半餉銀仍貯西安責成馬慧裕

台斐音經理糧臺州縣附近西安者就近請領

亦按十日開摺送

臣

核銷卽路途遙遠往返駁

查大抵此月所用之項兩月之後總可核定

臣

請自十月以後每月奏報一次爲日不久案牘

易清飭查不難得實偶有錯悞奉部駁詰卽時

急爲更正承辦之員亦可免受賠累除現行章

程隨時隨地有應行增減更改之處臣已札商

各路領兵大員查明所帶官兵數目核計每月

需銀若干容俟妥議酌定陸續分別奏咨立案

再臣奉

命專司糧餉而任兼兩省所有軍務情形皆當周知  
一切剿撫及地方事宜均係分內應辦之事而

軍情探報必須分布弁兵隨時往來方可無悞

機宜非有重賞罔能得力至陝省南界各卡隘

及西鄉平利一帶軍營臣稍有閒暇卽當親行

閱視所過撫勞官兵鄉勇均應賞賚費皆不貲

臣督辦糧餉自應潔已奉公此等例外賞需若

於公項支取不但易開假公濟私之漸亦且無

以督責屬員况養廉之設原爲辦公合無仰懇

天恩准臣預支總督養廉兩年以資應用分爲四年

坐扣歸欵不日軍功告竣諸費俱省臣所得一

半養廉儘可從容度用均奏入

上命軍機大臣傳諭松筠曰此次竄入平利紫陽賊

匪慶溥若能一鼓殲除擒獲首逆必當加之懋賞

今雖未能縛渠獻捷而各路堵剿嚴密將賊匪陸

續逼回川境不令北竄與張漢潮合夥俾陝西南

界漸次肅清所辦亦屬可嘉慶溥分撥官兵聲勢  
聯絡足見調度得宜不愧爲慶桂之弟卽王文雄  
柯藩溫承惠等均能實心堵禦小有斬獲尙爲出  
力但西鄉平利一帶道路分歧處處與川境毗連  
賊蹤無定難保其不復北竄松筠務當分飭王文  
雄慶溥柯藩等加意嚴防不可再令賊匪闖入其  
大所稱張漢潮一股現出五郎竄至孝義漸近商州





關勝保在景家坪搶獲大礮一位刀矛七十餘件  
或匪往來奔竄飄忽無定豈有閒暇之時從容鑄

礮自係向營汛中搶去若松筠飭查此項礮位如

無鑄刻某汛某號字樣或係賊匪自鑄若鑄有營

汛號數則當將該營汛將弁按律治以應得之咎

又另摺奏辦理糧餉事宜清查舊款另立新規所

辦甚是向來軍營冒鈔積習總在款項混淆拖延

時日並有此款例難開銷將別款通融牽扯以致  
輻輳不清易於滋弊今松筠令各路糧臺糧員等  
按旬開摺彙呈每月奏報一次不特案牘易清卽  
訪查亦無難得實其侵蝕朦混賠累之弊可以永  
除皆緣松筠平日廉潔自持故能正己率屬總理  
糧運必可勝任遠出福寧之上矣又據奏請預支  
總督養廉兩年分爲四年坐扣歸欵松筠奉公潔

已家無餘資朕所深信今身任總督軍營賞資所  
需自所不免著准其照數預支以資用度至藍白  
二號賊匪奔竄日久總當剿滅淨盡不係張映祥  
之有無也

松筠又奏言

臣

接奉

諭旨令查平利義首張奎等殺賊陣亡情形

臣

卽飛

飭確查茲據溫承惠及署平利縣知縣任奎光

稟稱義首吳大章業經投回據稱六月初二日  
同義首張奎徐名揚杜正貴董興劉俊揚等帶  
領鄉勇在高河梁與賊打仗殺死賊匪八十餘  
人賊匪後隊踵至寡不敵衆張奎首先衝敵被  
賊砍去首級杜正貴左手被砍當時陣亡徐名  
揚董興劉俊揚皆被賊匪擒去吳大章係滾巖  
由老林覓路回營又據賊營逃出難民何文太

等回稱賊首將徐名揚等拷問誘令投附徐名  
揚罵賊不屈隨被割口砍足至死罵不絕口劉  
俊揚董興同聲怒罵被賊捆縛用火燒死查慶  
溥打仗時曾有生擒活賊五名臣已飛飭卽將  
活賊變割致祭徐名揚等以慰忠魂所有義首  
張奎等五人仰懇

聖恩照從前吳繡才鍾萬周之例以外委議卹其金

家山陣亡義首林雄秀李興懷黃九公彭雲祥  
四名均屬捐軀與張奎等事同一體可否一律  
優卹之處出自

皇上天恩臣現委員攜帶銀兩先行撫卹張奎等家

屬俟奉到

恩旨再行曉諭其現尙存活之吳大章亦酌加獎賞  
至同時陣亡被害鄉勇三百餘名受傷五十餘

名及金家山陣亡鄉勇吳能仁等一百餘名受

傷三十餘名造冊咨部照例辦理再此次平利

紫陽西鄉堵禦賊匪所有官兵鄉勇均屬出力

臣

已備辦衣料銀牌牛羊米麩等物派委員弁

送赴王文雄慶溥柯藩溫承惠軍營將出力將

弁兵勇分別賞賚以廣

皇仁又臣據署鎮安縣知縣陳瑞詳稱咸寧縣典史



梁崇於嘉慶三年十一月奉委押解餉銀來縣  
并幫辦防堵及運送軍火糧餉該員不辭勞瘁  
半載以來均無貽悞茲於六月初六日解送王  
文化連殺七命案內要犯蔣文方赴省質訊初  
七日據逃出原差兵役鄭時望張明信回稟行  
抵河溝地方猝遇賊探數人梁典史持刀當先  
迎頭抵禦嗣賊衆踵至力竭被戕差役吳太董

發同時受害犯人蔣文方及其餘夫役俱被賊  
匪裹去旋准孝義廳移明六月初八日犯人蔣  
文方赴廳投首供稱遇賊被裹乘間逃出現在  
查獲典史梁崇屍身共受矛傷五處業經收殮  
並稱此股賊匪卽係張漢潮除將被害差役照  
例撫卹外典史梁崇應否議卹之處出自

皇上天恩至要犯蔣文方俟訊明定擬具奏仍將投

首緣由聲明再據護漢中府留壩同知汪銓詳  
報該廳安插軍犯李聚華虞維新金建廷馬三  
王志沖吳大德汪勝佐等七名於本年四月十  
二日賊匪猝至除吳大德汪勝佐當被殺害外  
李聚華虞維新持刀格鬪殺死賊匪一人割取  
首級奔赴府城投首其餘俱被裹去現已陸續  
逃回先後投到均屬守法可嘉可否邀

恩釋放回籍恭候

訓示奏入

上諭內閣曰本年六月內鄉勇在高河梁禦賊義首  
張奎杜正貴首先衝入賊隊奮勇力戰其死甚烈  
徐名揚劉俊揚董興爲賊裏去罵不絕口或被抉  
頤斫足或被縛投火中至死不屈此五人深明大  
義尤非尋常遇賊陣亡者可比均著以把總例議

卹又在金家山陣亡義首樊雄秀李興懷黃九公

彭雲祥四名均著以外委例議卹被擒脫回之吳

大章亦著從優獎賞以示鼓勵其同時在高河梁

陣亡被害鄉勇三百餘名受傷五十餘名及金家

山陣亡鄉勇吳能仁等二百餘名受傷三十餘名

均著加恩照例分別卹賞因思教匪滋事以來各

省義勇鄉民率皆團練堵剿保衛地方其不顧軀

集賢堂直學士卷之三  
三  
命力犯兇鋒者諒亦不少而帶兵大員奏報義勇  
陣亡寥寥無幾推原其故總由地方官藉鄉勇之

力以禦賊戰勝則冒爲己功甚至幕友親丁皆得  
濫膺保薦鄉勇轉不得與卽有陣亡被害者以其  
非在伍之兵匿不呈報無由上聞是鄉勇人等殺  
賊旣不能敘功徒死亦竟無贈卹何以慰忠魂而  
勵士氣豈不思鄉勇皆朕之赤子爲國出力力戰

被戕焉有父視子亡不加憐憫乎今徐名揚等陷  
賊後激于義憤甘以身殉死事之烈實堪憫惻可  
見我國家深仁厚澤惠養黎元小民具有天良皆  
知敵愾同仇之義故能捐軀報國視死如歸由是  
推之卽賊中脅從之人皆朕赤子未必盡陷溺本  
心甘附逆黨也嗣後各路鄉勇倘有打仗陣亡俱  
著照松筠所奏一體議卹以副朕嘉獎義士激勵

民風愛民如子至意再咸寧縣典史梁崇解要犯  
蔣文方赴審猝遇賊匪梁崇持刀抵禦力竭被戕

身受多傷卽與陣亡無異着照陣亡例議卹至蔣

文方係王文化連殺七命案內要犯被賊裹去乘

間逃回投首尙屬畏法蔣文方著免死減等發落

至留壩廳安插軍犯李聚華虞維新於賊匪滋擾  
留壩時奮力格鬪殺死賊匪赴府投首金建廷馬



三王志冲亦陸續投回俱著寬免軍罪釋放回籍

臣

等謹案國家設兵衛民伍兩卒旅戎制井

然原不藉鄉勇之力此次剿辦邪匪或因寨

堡團練自衛身家地方官因資以防堵或因

徵調過急一時權宜雇募三省軍營隨在皆

有數年以來衝鋒陷陣身膏原野者實不乏

人蓋凡食毛踐土之倫備荷浹髓淪肌之

澤有勇知方固屬分所應爾我

皇上憫念優加

特命查明義首張奎等被害情形

降旨褒嘉加等賜卹其同時戕害之數百人一體

恤賞並令各路援照辦理甚至獄囚徒隸亦以其能

格鬪殺賊

予以省釋

如天怙冒之仁宜其人思敵愾而志切同仇也

三十日

丙戌

福寧奏言竊

臣

欽奉

諭旨令查藍號白號賊匪是否卽係甘省竄出闌入

川境抑係該處新起之賊

臣

查川省逆匪除黃號

青號黑號線號以及有名無號各股匪不計外

其藍號賊匪前據大寧縣稟覆有老藍號小藍

號名目至白號股數尤多如賊目張添倫樊人

傑陳姓袁姓等均爲白號又有黃白號小白號  
分起錯出細查各匪俱非由甘省闖入亦非川  
省近日新起之賊實緣該逆等裹脅日久黨與  
漸增遂從大股分出小股兼有一股分爲數股  
及小股漸成大股者至甘省竄出之白號楊開  
甲張金魁等一股由南江擾至巴州營渠交界  
處所勒保已派總兵德齡副將褚大榮等帶兵

前往與遊擊楊國林會合夾擊其藍號張世龍  
張世虎一股昨竄至廣元後山經兵勇堵截據  
報仍折回寧羌又王登廷一股經額勒登保督  
師剿敗竄入東鄉其餘如包正洪業已就戮卜  
三聘樊人傑龍紹周唐大信顏中考龔建各匪  
游奕於大寧巫山之間德楞泰朱射斗刻下俱  
在彼分投兇擊此現在川省賊勢及各路官兵

剿辦之實在情形也再

臣

自接辦軍儲以來因

見各兵丁衝鋒陷陣無間寒暑所需衣履不得

不隨時添補是以上年冬間曾製辦棉得勝馬

褂棉套褲等件解送勒保軍營以資分散今歲

春夏雨水連綿各兵逐日進剿霑體塗足情殊

可憫復准勒保調取鞞鞋脚齒等件均經成都

重慶達州各處如數購辦解往其從前每遇各

營調用物件亦屬一律辦解此外如賞需一切  
凡零星需用銀牌各物有隨營糧員處辦供者  
亦有自達州製備運送者若值官兵剿滅大股  
賊匪悉由勒保酌量情形撥發銀兩轉解各營  
分別獎賞用昭鼓勵茲恭讀

諭旨以軍需動支欸項原不許額外濫用但亦不可

因例難開銷過事苛刻臣惟有凜遵

慈訓酌核辦理總期有裨軍行兵沾實惠至兵糧一

項尤爲軍中計日之需

臣

屢飭承辦各員暨各

州縣察看地方情形隨處預爲運貯并令確探

師行去向上緊協力輔特輸邇來官兵所到軍糈

俱極充裕不至匱乏矣入

上命軍機大臣傳諭魁倫曰前據福寧奏川省竄匪

有增無減而勒保則稱有減無增彼此不符今福



寧又稱細查各匪非由甘省闖入亦非由川省新  
起然則何謂有增是與從前原奏又自相矛盾矣  
其意止爲浮冒開銷地步已屬顯然且摺內又稱  
邇來官兵所到軍糈俱極充裕所奏亦係一派浮  
詞如果軍糈充足不致匱乏何以日前福寧又與  
勒保會銜奏請撥餉五百萬兩且其前次摺內所  
述情形若有迫不及待之勢是以先向山西借撥

若果勒保前此所稱賊匪有減無增之語屬實又何必急行請餉且爲數如許之多福寧旣與勒保奏請則此次摺內亦應將前經請餉五百萬兩之處一併敘入何以並未提及若謂此項銀餉到後方能充足則摺內又稱邇來軍精俱極充裕是日前已毫無缺乏前此又何必奏請撥餉乎種種前移互異或勒保前奏之摺竟係一人主見因恐干

駁詰卽將福寧之名一併列入繕寫並未與之關  
會而福寧竟未之知亦未可定著查明具奏再福  
寧奏各股賊匪皆係在川往來奔竄之賊而於李  
淑等一股在楚省邊境窺伺滋擾情形並無一語  
提及卽勒保節次奏報亦總未奏及此股賊匪豈  
李淑等在楚境游奕伊等駐劄達州竟全不得信  
並未聞知乎其故殊不可解福寧自辦理糧餉以

來種種經理不善又復支吾捏飾弊竇不一而足  
不可不實力清釐以期核實著魁倫於前抵達州  
查辦事件時卽備將福寧節年經手軍需欸項如  
何支發之處逐一清查如有侵冒浮開餽送權貴  
取巧肥家等弊卽行據實嚴叅毋稍徇隱若福寧  
實有必應叅辦之處魁倫卽可經手辦理伊係川  
省總督糧餉本係分內應辦之事卽如松筠亦係

陝甘總督其昨日奏到辦運章程甚爲得當著將  
松筠原摺抄寄魁倫閱看卽可仿照辦理也



欽定剿平三省邪匪方略正編卷一百十三 巳未年

八月初三日

巳丑

勒保奏言查額勒登保前由長

壽之葛蘭橋追剿王登廷一股賊匪於七月初

六日未刻前隊楊遇春所帶馬步官兵至黃沙

嶺探聞賊匪正在深谿過河卽催兵直前趕殺

由深谿至豐都之扶齊灘追剿三十餘里殺賊

一百五六十人淹斃百餘人生擒馮玉華等六

十八名初十日追至沙灘詎賊匪大隊晝夜狂奔暗留戰手二三百人在深林內埋伏欲截我兵後路鍋帳幸副將穆克登布聞信往擊立時

殺退追至懶板橙地方斃賊九十餘名生擒賀洪先等五十一名餘匪復歸賊隊竄逃連日官兵跟蹤追躡復於鐵山溝殺賊一百四十餘名

生擒秦本青等三十七名訊知王登廷因連被



大兵追殺與賊目庾姓李姓商量分出八九百

人向大竹渠縣一帶奔竄以圖牽綴官兵王登

廷率衆向東一路遁去額勒登保酌留總兵許

文謨帶兵一千餘名在後搜剿卽親率大隊直

追王登廷由鎮龍關一路前進臣恐許文謨兵

力稍單現又抽撥臣營及各州縣防兵一千五

百名添往協剿至德楞泰自雲陽之瓦屋嘴地

方掃蕩包正洪餘匪後卽帶兵馳赴奉節探知  
卜三聘龔建張添倫辛聰等均在大寧巫山交  
界之八石坪地方屯踞卽知會朱射斗與賽沖  
阿由大昌進兵德楞泰由寶塔直至大寧訂期  
兩面夾擊初八日甫抵大寧據報該匪等分出  
夥黨在鹽場附近之爛木灣鐵爐壩一帶掠食  
直逼鹽場德楞泰卽帶兵二千名先往剿捕初

九日午刻行抵該處賊匪驟聞兵至卽將旗械  
食物拋棄奔逃我兵追殺至石門埡共殺賊一  
百四十餘名生擒杜學瑚等三十七名餘衆均  
各遁回德楞泰因此路馬隊難行遂留兵堵禦  
石門埡卽轉至楊溪河一路進發適朱射斗等  
已抵大昌約定於十三日五鼓進兵十二日三  
更忽有賊匪潛來撲營經遊擊馬元得等擊退

斃賊二十餘名並據獲賊供稱卜三聘等因探聞此路有兵所以連夜派出戰手五百名前來探聽德楞泰旋即率同阿穆勒塔溫春穆克登阿李紹祖等帶領馬步官兵於寅刻至川埡子山下時有賊匪二三千名在山上搖旗吶喊捨死下壓我兵仰攻二次未能得手德楞泰親自督兵併力競進搶上山梁該匪等退回豹子嘴

官兵亦卽乘勢搶佔共殺賊二百餘名至黑虎廟山頂俯視八石坪賊寨男婦大小數千人極形慌亂適賽冲阿朱射斗帶兵由史家河搶上三义堙山梁殺賊七八十名兩路官兵齊至八石坪併力圍剿卽時攻破寨門拋擲火彈焚燒草棚該匪等紛紛四竄經我兵殺斃四百餘名生擒徐正明等二百四十九名口搶獲鎗礮刀

矛旗幟牛馬等物無算我兵分路追剿阿穆勒  
塔追趕一戴翎頂賊日至石滾坪正欲生擒被  
旁出之賊戳傷左膊阿穆勒塔仍帶傷力戰催  
兵鼓勇直前適賽冲阿朱射斗帶兵踵至協力  
剿殺該匪等復分三路欲向陰條嶺衝出房竹  
境內我兵又分五路疾追截回西竄未至入楚  
沿途又殺賊三四百人滾巖落澗者七八百人

生擒雷清盛等四百一十三名口並擒獲賊目  
梁方鎰及卜三聘龔建之師李谷青二名訊知  
各匪非竄鹽場卽奔徐家壩德楞泰委員將現  
獲各犯分別審辦一面與朱射斗李紹祖等分  
兵追躡以期全行殲洗再從甘肅竄來之白號  
一股賊匪爲首者係楊開甲張金魁二人自入  
廣元南江以後逃散者不下千餘人有向地方

官請票者有逕自逃回者先經遊擊楊國林阿克東阿等帶兵追躡據報楊開甲手下尙有千餘人遁入南江老山林內張金魁手下有一千六七百人欲由川竄回楚境楊國林等卽帶兵追剿于初八十二十九等日在板橋口楊柏河永興場等處三次殺賊一百七十餘名先後生擒胡長觀等八十七名現向營山境內奔竄前



臣添派總兵德齡等帶領兵勇協剿因由保寧

廣元一路進發道路相左現據具報由捷徑轉

赴營山正可迎頭截擊臣又飛飭該鎮等務須

將張金魁一股剋日掃除卽赴南江剿辦楊開

甲一股以期悉就殄平至此各路連日打仗

委驍騎校阿蘭保前鋒委官伊勒通阿遊擊達

自祥都司沈洪馬濟均受石傷屯副將銜阿噶

坤朋腿受矛傷俱不甚重其餘弁兵鄉勇間有  
傷亡容俟查明咨部

勒保又奏言查川省賊匪股數本多迭經官兵  
痛剿有在陝楚交界盤旋奔竄者先經臣咨行

兩省防堵之督撫提鎮分布卡隘實力嚴防俾  
川兵辦完一股再辦一股節據倭什布高杞王  
凱王文雄慶溥柯藩等奏報分兵防守均各嚴

密而倭什布則尤稱周備臣方以爲可恃乃於

七月十二日接據倭什布六月二十五日來咨

知李淑等於二十二日衝撲高子河營卡闌入

楚疆臣卽於是日飛行德楞泰帶兵速赴竹谿

進剿并咨覆倭什布一體協剿臣前奏情形因

相距較遠中有賊阻以致得信稍遲維時正值

德楞泰剿辦八石坪屯踞之卜三聘等股賊衆

纂言方輿彙編卷二百三  
計算二十日以前德楞泰必已接到便可由陰  
條嶺入楚現據探報賊匪在竹谿竹山之官渡

西河口一帶奔竄仍有折回川境之勢查竹谿

竹山房縣均與大寧連界猶之陝省之平利紫

陽西鄉等處在在與川境之太平通巴等州縣

毗連此處被剿情急旋卽竄入彼處忽楚忽川

均應趕緊剿辦臣又飛催德楞泰務須星夜進

兵會同倭什布將楚境之賊盡力剿捕卽不能  
一鼓掃除亦當全數截回川境查德楞泰現帶  
赴楚之兵六千餘名均係勁旅且前據楚省具  
報各處調募征防兵勇共有二萬餘名昨又新  
添廣西兵四百餘名雖經分佈各路營卡原可  
隨時調遣茲復蒙

皇上添派山西兵三千名更足敷用

臣

侯額勒登保

等現辦通巴營渠境內之賊稍有頭緒臣卽移

營川楚扼要地方就近督辦至賽沖阿李紹祖

等本在德楞泰一路剿賊前此因德楞泰追賊

至平利境內是以奏明酌留賽沖阿李紹祖等

在太平分剿迨德楞泰截賊回川賽沖阿等亦

卽仍歸伊隊現在德楞泰赴楚賽沖阿亦卽隨

同前進留李紹祖帶兵與朱射斗協剿大寧巫

山之賊亦已足資辦理至臣前此不請添兵之

苦衷自邀

聖明垂鑒茲蒙

皇上厯念軍務於添調山西兵三千之外又續調

盛京兵二千名前赴川陝協剿自更得濟惟思

盛京官兵必須撥給馬匹方可以供馳擊查川省

各營額馬本少因連年調用刻下勢難再調陝

甘各營額馬本多臣已札商松筠於陝甘各營

內挑派健馬三千匹齊至西安以備分給乘騎

之用再查健銳營翼長札準巴巴圖魯額爾特

依護解軍餉來川留於軍營茲因染患痢症於

七月十一日身故合併奏

聞

勒保又奏言查教匪日久蔓延總恃裹脅衆多



肆其猖獗前奉

恩旨遍貼膽黃并經臣設法分投傳播竟有同時散

出數百人至千餘名者可見

恩諭感孚至神且速現據賊隊中逃散之人及屢次  
拏獲活賊供稱從前老教每以裏脅爲事近因  
被擄者咸知投出免死旋擄旋散轉將久經從  
逆之人倒戈殘殺或誘令同逃因此不敢肆意

集之二子牙自乙學士統卷之三  
十  
逼脅惟真正教匪尙復心懷疑懼不肯出投然

亦有一二投出者或赴官請還產業臣卽令地

方官查明給還或隣里不能見容臣亦令地方

官另行安插俾去其疑畏之心堅其向善之意

庶習教者聞風知感翕然來歸更爲事半功倍

至受撫回籍者誠不外居之食之之道前經臣

議於散出時酌給銀米路票及到籍後歸寨搭

期以資棲止復檄調知州劉清并札詢素有清  
名之州縣方積曹庠業劉佳璠趙華張位中等  
悉心籌畫又經總理司道詳加核議其大概亦  
不外臣所奏章程臣復與之詳加參酌以愚民

無知辦理祇期簡要若立法過峻防弊太嚴未  
免轉多窒碍當卽刊刻簡明條款遍行曉諭并  
通行陝甘楚豫等省一律照辦並再飭知各路

領兵諸臣及地方官多方設法將膽黃告示傳  
播賊隊中俾得共見共聞以冀立時解散加意  
緝斷不可於受撫來歸之人稍存膜視或吝  
惜錢糧轉致無所依歸又復流而爲匪仍嚴飭  
各路將領上緊剿捕不得因有安撫一節懈兵  
將殺賊之心庶剿撫兼施以期仰副

聖主恩威並用至意均奏入

上命軍機大臣傳諭勒保曰此次額勒登保追剿王  
登廷一股沿途俱有斬獲旋因賊匪分向大竹渠  
縣一帶奔竄希圖牽綴官兵額勒登保留總兵許  
文謨在後搜剿伊卽親率大兵緊躡王登廷直前  
奮擊所辦可嘉德楞泰探知卜三聘龔建等在八  
石坪屯踞卽知會朱射斗等協剿將賊寨攻破亦  
屬出力而阿穆勒塔因追趕賊日被旁出之賊戳

傷左膀仍帶傷力戰可嘉之至並分兵五路疾追將賊匪截回西竄不至又入楚境覽之欣慰至所

稱聞知李淑等股闖入楚界卽飛行德楞泰速帶

原領官兵赴楚追截所辦原無不是但此時方知

惜乎遲矣且勒保於七月十二日接據倭什布咨

會李淑等闖入楚境直至二十四日始行具奏朕

因此股賊匪東竄時深厯切屢經降旨詢問勒保

何以尙未得信今閱摺內日期是伊久已接咨遲  
至十二日之後方與各路打仗情形一同奏報勒  
保寧不知朕憂勞軍務無時或釋耶勒保從前堅  
稱毋庸添兵並以賊匪有減無增爲辭廻護前奏  
今見添調盛京山西兵丁又稱有此項兵丁協剿  
更爲得濟所言總屬自相矛盾至應添新兵馬匹  
旣據勒保知會松筠挑備自可卽行齊備送赴軍

營應用至勒保數月以來總在達州坐守今賊匪  
早入楚境始欲移營前往已屬遲悞况勒保於剿  
賊機宜漫無調度卽出境數百里督辦恐亦無益  
於事此時勒保惟當札飭德楞泰將竹山竹谿之  
賊迅速殲除尙可稍贖前愆耳再翼長額爾特依  
病故卽著照軍營病故人員之例辦理

上又命軍機大臣傳諭魁倫曰本日據勒保奏於七



月十二日接倭什布六月二十五日來咨知李淑  
等闖入楚境之信卽日行知德楞泰帶兵速赴竹  
谿進剿等語勒保身任經畧各路賊情皆應隨時  
確探預爲調度况李淑徐添德等係四川久經著  
名賊目旣經擾及楚境伊竟毫無聞見已屬憤憤  
及七月十二日接到倭什布來咨並未立將此股  
賊匪滋擾情形及如何派兵前往助剿之處先行

馳奏直至接奉嚴飭諭旨始於七月二十四日繕摺具奏實屬遲緩且其所稱當日卽行知德楞泰

赴竹谿進剿之語亦恐未必確實著魁倫於審訊

勒保時檢查倭什布來咨及勒保札行德楞泰日

期與原奏是否符合並查明李淑等股賊匪本係

何人剿辦是否卽勒保所派之七十五德英額呂

朝龍等縱令入楚一併嚴叅治罪又昨面詢惠齡

軍營情形據稱伊自川起程回京面見勒保勒保  
告知賊多兵少如到京時召對垂詢務必奏請添  
兵此外並無他語是勒保之意本欲多添兵力故  
諄囑惠齡奏請何以節據勒保所奏總稱不必添  
兵並經朕詳悉開導仍執奏如前而本日摺內接  
到添調盛京山西官兵之信又稱現在飛咨松筠  
於陝甘備辦馬三千匹並稱不肯添兵之苦衷自

蒙洞鑒前後自相矛盾勒保又有何苦衷耶現令  
軍機大臣傳詢帶領健銳火器兩營官兵回京之  
章京等據翼長舒通阿稱勒保於奏明遣回京營  
官兵後又欲奏留舒通阿所帶之兵五百名業經  
發摺復行追回勒保於派往健銳火器兩營官兵  
不能加意鼓舞概行遣回已非體制迨續行具摺  
欲將舒通阿所帶之兵五百名留川是此項官兵

尙能得力何以於發摺後又將原摺追回茫無主  
見顯係回護前奏必欲自實其言以見滿洲兵之  
無用似此安能得軍心而伸士氣耶並著魁倫向  
勒保嚴行審訊令其據實登答定擬具奏至勒保  
所奏撫卹難民章程著抄寄魁倫閱看是否可行  
著酌量辦理

同日恒瑞奏言查藍號賊匪所剩不過五六百

人竄出大山老林又復折回川北南江境內官

兵連日搜獲林內藏匿之孫世奇等六十三名

多係乘間逃出被裹民人其中祇有落後真賊

十一名訊據供稱賊目張世龍等因連被官兵

截殺裹脅之人盡行逃散實不敢與官兵打仗

今要尋白號合夥當將該犯等正法其被裹難

民均給與路票釋放查此股餘匪節經剿殺人

數旣單自必歸入白號駭內臣現准勒保來咨

令卽帶兵入川追剿但前派遊擊楊國林等帶  
兵一千六百名業經追剿白號入川勒保又派  
總兵德齡副將褚大榮帶兵四千前往截剿此  
時藍號餘匪入川核其兵力已敷剿辦而目下  
陝省西鄉邊界賊匪尙多且張漢潮賊駭在漢  
江北面分股奔竄爲日已久西同鳳三府所屬

迤南居民時時驚避卽河南邊界亦未能安堵

自當厚集兵力先將此股速行撲滅騰出萬餘

官兵剿辦西鄉之賊庶可及早肅清陝境臣惟

有酌量緩急斷不敢稍存拘泥除咨明勒保外

現派遊擊張占魁都司陳兆熊等帶領兵勇八

百名在寧羌邊界擇要駐紮以防逆匪折窺陝

境臣仍遵



旨趕緊馳赴江北探剿張漢潮賊匪以冀迅速歲事  
再遵查張映祥一股卽係白號賊匪前於五月  
中竄至徽縣松筠恐其由兩當鳳縣東趨與張  
漢潮合夥曾經知會各路嗣賊匪於六月初一  
日由白水江上游南竄畧陽沔寧入川現卽係  
德齡褚大榮及楊國林等在通江一帶剿辦奏

入

上命軍機大臣傳諭恒瑞曰藍號賊匪現已折回川  
北經勒保派令總兵德齡副將褚大榮帶兵四千  
前來截剿儘足剿辦恒瑞帶兵趕赴江北探剿張  
漢潮一股所見尙是昨據明亮奏賊匪已由五郛  
竄至商州明亮馳往迎剿而永保慶成自西而東  
帶兵繼至今恒瑞又復馳往截擊以四人之兵力  
剿一張漢潮老病無能之賊務須乘此兵威速行

撲滅騰出萬餘勝兵幫剿平利紫陽之賊以期及早肅清陝境

初四日 庚寅

上命軍機大臣傳諭明亮魁倫倭什布吳熊光日前據松筠奏陝西鄉勇多有奮勇殺賊遇害陣亡者請交部分別議卹已明降諭旨加恩三年以來各路從無此等奏報用其力而不卹誠難得其心矣

地方義勇鄉民隨同官兵打仗出力上爲國家敵

愾下爲鄉里保障其中有不顧軀命力犯兇鋒並

身陷賊中抗節不屈者以小民而能激於義憤志

切同仇深堪嘉憫若不據實上聞加之獎賞則鄉

勇等殺賊旣不能敘功徒死亦竟無贈卹似此漫

無激勸伊等豈肯用命甚至被賊裹脅轉爲賊匪

所用亦未可定松筠前奏實爲得當著傳諭明亮

等各路鄉勇如果有忠義奮發殺賊陣亡者皆當一體辦理其隨征打仗倘有分外出力者亦須隨時獎賞並可酌給頂戴既足以示鼓勵而衆鄉勇亦可藉資統率不致散漫無紀又賊匪脅從難民節經降旨諭令安爲招撫昨據勒保奏同時散出者有數百人至千餘名不等並將安撫事宜開單進呈此等民人真心投出者固多而心懷反側者

恐亦在所不免總當於受撫之中仍寓防閑之意  
使之卽時散處勿令聚集方爲妥善倘有來斯受  
聽其留住營盤充當夫役其爲數多者旣慮有心  
懷叵測之人又生反覆或乘夜驚擾搶刦糧餉軍  
火等項殊有關係卽爲數少者亦安知非一時詐  
降探聽軍情機密仍復乘間逃回轉致賊匪得以  
知我虛實朕聞各路軍營中遇有投出之人卽令當

夫助役迫數日後其人已不知去向亦復置之不問試思被賊掠去之人賊卽刺白蓮教字樣而投回之人轉似此全無防範又何怪賊匪之奸細衆多往來自若豈不爲賊所笑自後各路軍營遇有投出難民務須交地方官詢明來歷卽爲分別安置並量加周給俾得依棲有所口食有資勿使停留聚處別滋事端此等難民若不妥爲經理速行

安頓則投出之後仍復難免流離設使饑餓難堪  
必又去而從賊何以廣招徠而散賊黨耶總之辦  
理賊匪惟當以剿爲重如能將真賊痛加殲戮使  
之震懾軍威則其附從黨與及被裹之人自必畏  
死投出其降亦固而安撫之事尤在隨時分散安  
置得所於軍務方有實效也再邪教滋事起自楚  
省沿及河南川陝地方往來奔竄三載有餘黨夥



既及十餘萬其中附和褻脅者居多實在教匪必  
不若是之衆總緣起事之初地方官辦理不善激  
成事端蓋科邪教之罪自有本律原與叛逆殊條  
除倡立邪教名目傳徒惑衆爲首之犯律應斬決  
外其爲從者祇遞減流徒至於燒香念佛持齋誦  
經皆係愚民無知自有應得之罪迥非身犯叛逆  
罪應凌遲子孫緣坐者可比乃州縣等因奉文緝

拏邪教遂爾公差四出暮夜捉人幾與查辦叛逆無異以致人心驚惑逼迫變生甚至邪教正犯賄

囑差役縱令潛逃將村莊富戶竄名其中妄拏拷

掠藉此索詐銀錢輾轉牽連州縣竟視拏邪教爲

利藪矣從前臺灣之林爽文及此次達州王三槐

之滋事未必不由於此是其初不過治以邪教罪

名可結之案而其繼竟成爲叛逆勞師糜餉日久

尙未蕲功將來賊平之後恐此等念佛燒香之事  
尙不能免如果有邪教之名自應嚴行查辦但當  
按本律治罪不可照川楚餘匪視同叛逆卽現在  
從賊中投出難民亦皆送還原籍安置倘有生事  
之徒以其曾經從賊挾嫌告訐州縣等務當秉公  
聽斷不得以川楚邪黨妄行處治明亮等當通飭  
各地方官一體凜遵妥辦又勒保初三日奏到摺

內稱賊匪驟聞兵至卽將旗械食物拋棄又稱我  
兵搶獲鎗礮刀子旗幟牛馬衣物無算等語賊匪  
見官兵追趕緊急故將物件拋棄以餌我師乘隙  
遠遁明係賊匪詭計而官兵墮其術中以致不能  
趕及此後追剿賊匪總當以緊躡賊蹤奮力剿殺  
爲要卽有賊匪遺棄物件毋許官兵當時爭取若  
果能直前殲滅則賊匪遺棄之物終爲我有何必

亟於貪得轉縱賊匪遠去耶

臣

等謹案齊民喻義賞卹所以得其心逆黨  
投誠撫安所以散其勢我

皇上宵旰勤勞

運謨廣遠前已疊降

恩旨籌立章程茲復

申諭明亮等查核各路鄉勇之出力用命者敘功奏

聞俾得膺

恩旌賞至賊中投出者卽時妥爲安插旣消反側亦

免流離

詔書寬大固已兆庶維新矣而

聖人好生之心猶以從前地方官查拏邪教辦理不

善激生事端

特揭叛逆邪教之罪不同糾

詳明訓示辨析至精正愚氓之趨向弭告訐於未形  
所謂大畏民志而使民無訟者也

初五日辛卯林僑奏言查督臣勒保督率各領兵

大員分路剿捕臣從前節次派撥之米業已陸

續起程現在官兵乘勝前驅師行迅速必須源

源接濟臣與臬司先福會商加派米五萬石分

飭各路臺站加緊轉輸並派委妥員實力催儻

務期隨到隨行俾得益資寬裕至龍安松潘一

帶均與甘省毗連前經派有文武各員督率兵

勇各於交界處所分設卡隘嚴密巡防所需軍

火糧餉亦皆隨時籌運不致缺誤日下正值大

雨時行之際軍營帳房易於損壞調用較多

臣

已會同營員加緊製辦送營其餘各項軍需亦

俱運供足用再前因達州一時餉銀不繼曾在



省城借解過銀六萬兩昨蒙

恩賞發軍餉到來臣於兌收後立即傳齊各鋪戶當

堂如數給領均已一律清還並不敢假手胥吏

致滋擾累奏入

上命軍機大臣傳諭林儁曰林儁奏現在師行迅速  
已與臬司先福會商加派米五萬石僱運等語所  
奏殊未明晰此項米石如係添撥軍糈即不應有

加派字樣若因饋運不敷派之民戶則是擅行加  
賦林儁並未奏聞祇與先福會商遽爾加賦病民  
有是理乎著傳諭林儁如係摺內措詞未妥則已  
倘竟向民戶加派米石應卽照發還鋪戶借銀六  
萬之例速籌米五萬石一律清還不得假手吏胥  
致有侵蝕至前發川省餉銀二百五十萬甫經到  
彼豈能一時用完乃勒保又復與福寧會銜請餉

五百萬兩另立賑濟等項名色巧爲朦混是以未  
卽撥發昨魁倫往署川督已諭令據實嚴查具奏  
再行酌撥朕從不吝惜帑項若果事在急需亦斷  
不肯計較多寡致軍儲稍有匱乏特以勒保一次  
卽請五百萬兩之多實屬孟浪不得不加以核實  
且請餉之摺原係勒保福寧聯銜及福寧自奏辦  
理糧運摺內並未將請餉一節聲敘轉稱邇來軍

精俱極充裕前後自相矛盾其故尤不可解林儁  
雖不在軍營經手帑餉然係本省藩司於支發欸  
項必知其詳著卽行確切查明究竟軍營需銀若  
干核實奏聞毋得稍有徇庇再川省賊匪股數衆  
多忽分忽合官兵剿辦日久總未蕩平自本年正  
月以來賊衆是否增多抑實形減少林儁在川耳  
目較近並著查明具奏

欽定剿平三省邪匪方略正編卷一百十四

己未年

八月初六日

壬辰

明亮與肇奏言張漢潮股匪蓄

意奔竄豫省經

臣

於西北兩面往來截剿並於

商州一帶入豫要路嚴密布置留鎮臣關騰收

齊落後官兵五百餘員名在彼幫同知州陳祁

帶領鄉勇堵禦賊匪不敢乘間窺伺向白浪至

袁家灣等處偏東挺走查該處離楚省二鄖較

近且聞鄖陽府兵守空虛僅有署副將遊擊郭  
廷樞帶兵一百二十七名已往金家坪堵禦又  
接倭什布來咨知川匪亦入楚境若張逆乘間  
竄往前有川匪滋擾又再添一股賊匪蹂躪關  
係匪輕臣星夜督兵沿豫省邊境荆子關青山  
一帶行走既可顧住豫省又可繞出賊前迎頭  
擊剿二十二日馳抵鄖陽府該處居民聞賊匪

竄至狗頭坪相離甚近俱極驚慌逃避及

臣到

彼面加撫諭以後面大兵接踵而至爾等毋過

惶懼人心方定並飭鄖縣知縣葉治曉諭居民

妥爲撫馭是晚據探信兵勇擒獲賊探徐琮趙

奉二名訊知張漢潮探聞鄖陽府有大兵攔截

由原路折回向高壩店竄逃

臣

卽趕緊兜剿及

繞至長崗嶺張漢潮又復潛回中村土門一帶

向鄖西東趨臣又從紅廟子趙家川抄截賊匪

竄至十里坪梁家墳等處滋擾臣沿路見鄖西

鄉勇團集甚多皆自備乾糧實心捍衛然無官

兵督領恐不足恃是以臣飛卽抄道趙家川趕

赴鄖西查看該縣僅有候補守備把總修永宏

典史李殿英帶領鄉勇守城糧道恒慶知縣孔

繼楨分帶兵勇已往上津鋪漫川關一帶堵禦



臣沿途安撫百姓並鼓勵鄉勇小心實力防堵

現有官兵迎剿毋得稍存退縮該鄉勇均極勇

往適據探報張漢潮率領餘孽竄至七里溝

臣

聞信連夜督兵進剿行抵白崖寺恐該匪聞風

先遁當卽傳令官兵潛蹤匿跡由山坳進發詎

該逆翻山又從蒿坪河遁走

臣

卽由中村一帶

尋蹤躡逐二十六日探報賊匪在辣椒園屯紮

臣飛卽於二鼓發兵黎明馳抵該處賊匪業已

拔營前竄相隔不遠當卽飭令馬步官兵馳逐

連翻三座大山趕至六七十里行抵紅河寺始

得追及賊匪後隊官兵直前衝撲該匪爬越山

梁合成大隊分頭抗拒十分兇悍臣飛飭愛星

阿侍衛富蘭等督率索倫馬隊廣東官兵搶上

左手山梁臣興肇同鎮臣長春協領那全等帶

領步兵搶上右手山梁

臣

明亮督領侍衛墨爾

根額副將多爾濟扎普等帶領馬隊百餘名及

甘涼步隊從山腰突入正遇賊隊矛手衝出索

倫甲兵德尼保首先射賊左肩受有矛傷仍趕

射賊衆官兵奮勇直前鎗箭齊發斃賊四五十

名生擒騎馬賊人曾義順等七名賊衆抵敵不

住翻山遁走適遇愛星阿等從山梁下壓

臣

興

肇從對面施放鎗礮三路齊進斃賊百餘名生擒姜發祥等三十七名追殺六七里至柿坪地方忽從兩山溝內突出二百餘矛手截斷馬隊被委叅領驍騎校都爾博卓爾渾保領馬隊衝擊殲斃大半餘匪扒山亂竄千總李文秀因箭全射完身受矛傷陣亡索倫領催濟爾噶圖生擒執旗頭人陳思源一名訊知張漢潮遙見官

兵從山上壓下賊匪殺傷甚多卽帶領男婦老  
幼先行逃竄騎騾翻山跌下坡來墊傷左腿冉  
學勝等趕來扶起拉跑頭人徐朝恒亦中箭身  
死臣因官兵追趕一晝夜暫令歇息仍復鼓勵  
追擊使賊匪喘息難寧若遇慶成永保帶兵前  
來可期合圍殲滅臣思該逆一經官兵趕及何  
以卽先聞風捷竄細加躡探緣到處有一種山

匪無室無家向來學習邪教與之送信兼之沿

途山廟寺院總有一二僧道賊匪屢次經過並

未躲避亦從不見傷害難保其不為賊使是以

我兵日夜往來兜截該匪總得向無兵處所游

奕躲避臣一面飛咨該督撫嚴飭地方官不動

聲色密行訪拿並將山廟寺院僧道飭令移住

近城廟宇安置俟剿竣賊匪再行釋回以絕積弊

同日倭什布奏言李淑等股賊匪前次攻撲房  
縣城池經臣派兵擊退後遂竄聚西南三十里

之銀杏坪旋有房縣生員王占觀被裹逃出赴  
營投到據供此起賊匪有青藍白三號藍號係  
李淑青號係徐添德合爲一營共有八千餘人  
白號係宋廕子另爲一營共有三千餘人各賊  
多係四川達州人因李淑原籍襄陽邀同徐添

德等要從保康南漳逃往襄陽臣以該匪既注

意東趨則軍馬堡黃龍堰陳家舖俱係東竄要  
徑當就現有兵力於該三處扼要分駐晝夜防  
範詎賊匪於二十四日午後分爲三股每股約  
二千餘人由軍馬堡黃龍堰陳家舖分路並竄  
官兵施放鎗礮賊亦放鎗抵拒相持一晝夜不  
期餘匪傾巢而出卽於是晚繞至房縣南路由



藍灘柏木坪一帶疾趨而東竄入保康之壽陽  
坪次早三路賊匪又各退去俱向南奔官兵分  
路追擊沿途均有斬獲臣以賊匪既入保境未

便徒事尾追轉致促之使東當卽率領兵勇由  
房縣北路晝夜兼程二十九日抄赴保康賊已  
竄至該縣歇馬河螃蟹溪等處有入南漳之勢  
臣現在分兵兩路由東北兩面悉力兜圍總期

通歸西南山徑不使竄出平陽大路直犯荆襄

至山西頭起官兵不日即可到襄臣已飛飭領

兵官取道南漳迅速來營沿途如遇賊匪卽行

隨處截殺所有漢江一帶船隻早飭令地方官

一律提禁現又飛札襄陽府張瑤派員往來稽

查無論大小船筏均不許在南岸停泊其往來

商船亦令緊靠北岸行走以免賊人搶渡現在

河南撫臣吳熊光已派道員完顏岱陳鍾琛帶

領豫省兵勇在光化老河口駐劄防江臣並飭

知該委員等察探賊勢協同楚省北岸兵勇沿

江實力防堵刻下江水寬深賊匪斷難飛越惟

現據巴東興山等縣稟報川省夔巫大寧賊匪

經官兵分路剿殺情急亂竄現有一股衝破巴

東之湘泗嶺卡由老林行走向房縣奔竄臣查

巴東所設兵勇各卡本在沿渡河以內而現在  
賊匪竄入之湘泗嶺係在沿渡河之外向係該  
處居民自集義勇防守相去官卡尚有八十餘  
里當卽飛飭防守巴東之宜昌鎮總兵王凱酌  
帶兵勇將此股賊匪截剿出境卽於湘泗嶺安  
卡嚴堵茲據防守房縣邊境之副將樊雄楚等  
稟稱十六日探聞川匪一股由巴東湘泗嶺繞

至房縣邊隘以內之五里坡滋擾該副將帶領  
兵勇直前迎剿殺斃賊匪三百餘名生擒石叻  
蓮等男婦二十九人搶獲白旗兩桿上書田字  
藍旗一桿上書中營總兵字樣訊據獲賊供稱  
賊中頭目係辛袁張三人餘匪翻山越嶺由洛  
陽河抄向九道梁竄去當卽知會該處巡檢黃  
詔截其去路以便兩面夾攻詎賊匪竄至九道

梁蜂擁撲卡該巡檢帶領鄉勇衝入賊隊殺死  
賊匪五六十名黃詔力竭陣亡適樊雄楚帶兵  
趕到從後截殺又斃賊多名賊由九道梁竄入  
上龕正在追殺間復接探報後股川匪亦由湘  
泗嶺竄入仍向此路行走誠恐陰條嶺一帶邊  
卡前後受敵卽帶兵轉回截剿等情又據探報  
前次竄入竹谿之羅半年一股現又分爲兩股

其頭股已由漳洛河蒙果寺一帶竄聚房縣白  
玉坪上龕等處與湘泗嶺竄來之賊會合人數  
甚多其後股仍在竹谿邊界向家壩一帶遊奕  
並據被裹逃出之胡長發供稱現竄上龕之賊  
目係樊高二姓羅半年並不在內臣查此時賊  
股紛奔其首逆姓名或有假託著名之賊以張  
聲勢者其現來之高樊二姓及辛袁張三人是

否卽係高均德樊人傑辛聰張添倫等未得其

實惟該匪等屯聚上龕無兵剿辦臣所帶之兵

尚不敷剿捕李淑等股之用實難再行分撥而

房縣城垣低矮恐啟賊匪窺伺之心臣於現帶

兵二千餘名內又酌撥二百名派員帶領前赴

房縣協同本汛兵丁及原僱鄉勇實力保護以

免疎虞其各處義勇究不足恃臣現在遍諭居



自民憑山結寨將人口糧食盡歸寨內併力守禦  
免其裹脅掠食刻下早稻將次成熟現亦諭令

居民趕緊刈穫以絕盜糧

臣

伏查楚北與川省

連界處所雖經設有邊卡第地界綿長各卡相  
去數十里不等而每處所設兵勇又止數百名  
今川省各股賊匪經大兵分路截剿情急狂奔  
盡圖入楚楚之荆襄素稱重鎮且北連豫省東

接三江最關緊要以現在情形而論自以楚北

爲重臣現已飛咨勒保卽派領兵大臣多帶勇

敢鎮將統率重兵速來楚省會同勦捕如能卽

就楚地以次殲除固屬甚善否則亦將各股竄

匪仍行逼歸川境以期聚而殲洗均奏入

上命軍機大臣傳諭明亮曰張漢潮一股最爲狡詭

自經官兵截殺輾轉奔逃其意竟欲勾合各股賊

匪乘秋涼時一同突入楚境肆行滋擾今因豫省  
邊界防範較嚴不敢窺伺復向東鋌走竄近鄖陽  
一帶往來奔突鬼蜮伎倆實爲可恨幸而明亮沿  
豫省邊境繞出賊前馳抵鄖陽在十里坪紅河寺  
等處兩次將賊匪大加剿殺賊始翻山逃遁未能  
竄入楚豫此皆由明亮預揣賊情迎頭繞擊得占  
先著是以能將賊匪截回深堪嘉獎惟因慶成永

保落後遲延不能併力合擊又任乘間西竄此則  
慶成永保之咎自當查明另行核辦至明亮現已  
帶兵向西追擊不予賊匪以暇自屬正辦但楚省  
此時奔竄股數較多李淑宋鏗子徐添德外又有  
川省賊匪高均德樊人傑辛聰張添倫等分股竄  
入竹山竹谿等處以大局而論楚省勢頗緊急倭  
什布處兵力甚爲單弱而川兵至今總未入楚且

路徑紛歧難以處處堵禦若賊匪深入楚境或入  
豫省邊界殊有關係前已調盛京兵二千名今又  
續調吉林黑龍江兵各一千名令其赴楚協剿並  
令額勒登保由東鄉前赴鄖陽一帶幫同剿辦此  
時楚省情形最爲著重明亮追剿張逆一股勢已  
窮蹙且據奏該逆翻山逃竄時又墊傷左腿自難  
遠颺明亮此時如已與慶成永保會合四面兜圍

將張漢潮卽時擒獲固屬甚善倘尚在奔竄而慶  
成永保迎頭堵截已將張逆圍困不能復行他竄  
可無須明亮在彼協擊明亮當仍回二竹一帶與  
倭什布奮力剿辦楚省各股竄匪若明亮察看慶  
成永保二人尚未可恃亦不可因有此旨卽將張  
漢潮一股諉之慶成永保二人以致垂斃之賊復  
延殘喘况明亮追剿張逆已半載有餘若功屆垂

成又復舍而他顧不卽乘勢殲除豈不可惜此事  
總在明亮酌量情形預操勝勢也又據奏賊匪一  
經官兵趕及聞風捷竄竟係該處山匪及山廟寺  
院僧道暗爲送信等語官兵往來兜截而賊匪總  
向無兵處所奔竄自必有潛爲探信之人但恐不  
止山匪及僧道等卽軍營內鄉勇民夫亦恐有爲  
賊匪耳目者明亮務須嚴行稽察設法防範不使

賊匪得以知我虛實庶可收攻擊之效所有此次  
受傷陣亡之千總李文秀著咨部賜卹

上又命軍機大臣傳諭松筠曰前據明亮等奏與慶  
成承保會籌分路截剿張漢潮一股竄匪本期兩  
面夾擊不予以暇乃自明亮與慶成承保分手後  
明亮則已於七月二十二日馳抵鄖陽迎頭遮擊  
賊匪不敢闖入楚豫張逆業經折回而慶成承保



自前此奏報之後已閱二十餘日如何追躡情形  
並未見續有奏報已屬遲緩且明亮上次摺內卽  
稱張逆若折回商南一帶慶成永保相繼而至可  
以四面圍圍此次摺內又稱現在直前追擊若遇  
慶成永保帶兵前來卽可合圍奮擊而慶成永保  
杳無信息則所謂在後追躡者究係何事豈又遇  
別股賊匪爲之牽綴抑竟有意逗遛不進耶向來

軍營疲玩因循又忌人成功不肯出力幫助最爲  
惡習看來慶成永保竟不免忌明亮成功有心貽  
誤著松筠卽將伊二人何以遲延多日並未趕上  
賊匪此二十餘日內究在何處帶兵前進日行幾  
里是否途中遇有別股賊匪在彼剿辦抑竟在何  
處扎營坐守逗遛不進之處切實密行查察松筠  
平日最能實心任事之人且初到督任於軍營帶

兵大員無可偏向况松筠現在辦理軍糈如有此等擁兵玩悞惟知坐糜糧餉之人亦豈不同深憤恨務須秉公詳查據實具奏如慶成永保果因剿辦他股賊匪遲延尚屬有因倘係觀望不前日行不過二三十里或竟有畏賊逗遛及忌功阻撓情事則軍紀自有明條松筠卽當按其情罪重輕據實叅奏候朕核辦

上又命軍機大臣傳諭倭什布曰川省賊匪因各路官兵分頭迎剿情急狂奔而賊首李淑等各股賊匪前因氣候炎歎在山藏匿近交秋令始出而肆擾又窺楚省兵力稍單是以盡圖入楚現據倭什布飛咨勒保選派領兵大員速領重兵赴楚會剿前已據勒保奏報派令德楞泰帶兵由陰條嶺馳赴湖北而山西頭起兵丁已入楚境其後起兵丁

及盛京兵二千名已諭知吳熊光妥爲照料迅速  
過行計皆可陸續到楚今又於吉林黑龍江各調  
兵一千名亦可接踵入楚復因帶兵大員內惟額  
勒登保奮勇素著剿賊認真已諭令額勒登保由  
東鄉一帶馳赴鄖陽是各項勁旅新兵雲集楚省  
而又有額勒登保督率帶領自可以次殄除此時  
倭什布惟當董率各路兵勇實力嚴防相機辦理

以待大兵踵至總由東北向西南兜剿爲一鼓殲擒之計至勒保於七月十二日接據倭什布咨會

卽飛行德楞泰令由大寧通巴一帶赴楚今日倭什布奏到之摺係七月三十日拜發相距已將兩旬不但德楞泰尚未到楚且摺內亦未提及德楞

泰入楚信息著倭什布差人前往迎探催令迅卽到營將來德楞泰到後伊於此兩旬中究由何處

行走因何在途延緩並著倭什布詳晰查明據實  
密奏其禦賊陣亡之巡檢黃詔卽著咨部賜卹

上又命軍機大臣傳諭魁倫曰前據勒保奏額勒登  
保帶兵直追王登廷一股賊匪由鎮龍關一路前  
進因思現在各處賊匪惟湖北最關緊要而各路  
帶兵大員惟額勒登保一人最爲勇往出力此時  
賊匪王登廷在東鄉一路卽或窮極奔竄亦不過

集賢堂牙具身工級卷一百四  
旁及西鄉平利一帶非楚屬逼近豫省者可比以

久經行陣奮勇素著之額勒登保剿此僻地窮蹙  
之賊未免長才短馭計此時魁倫將次可抵達州  
而王登廷一股賊匪有總兵許文謨及副將穆克  
登布等在彼追剿亦足殲滅餘黨魁倫接奉此旨  
著加緊馳赴東鄉一帶督率許文謨等專辦王登  
廷一股替出額勒登保令其迅赴楚北鄖陽鄖西



保康等處跣探房竹間賊蹤趕緊剿辦其應帶之  
將弁兵丁俱聽額勒登保自行選派帶往

上又命軍機大臣傳諭額勒登保曰自用兵以來各  
路領兵大臣惟額勒登保實著勞績深得衆心且  
於軍營辦理糧餉事宜亦甚廉明朕心深爲嘉獎  
今祇令辦理王登廷一股賊匪豈非長才短馭朕  
已降旨諭令魁倫另行派員辦理現在各股川匪

竄入楚境者甚衆額勒登保卽帶領平素得力之  
兵速往湖北由鄖陽府取道前進此係從東北向  
西南擊剿德楞泰現由西南追趕前來正可與之  
前後夾擊額勒登保入湖北境後或遇現調來楚  
之山西兵及盛京兵節酌量帶領迎頭前往擊剿  
如能在湖北境內將賊匪全行殄滅固屬甚善倘  
一時未能完竣仍向西南追剿使賊匪退回四川

亦無不可惟在額勒登保勉副委任也

上又命軍機大臣傳諭秀林那啟泰曰現在川陝楚  
三省邪教有名首逆陸續剿滅餘匪指日即可掃  
除從前吉林等處所派兵三千名從征已二年有  
餘東馳西擊兵力未免勞疲著秀林那啟泰於吉  
林黑龍江兵內遴選人材勇健技藝熟嫻者各一  
千名再於章京內慎選明白奮勇約束嚴明之員

帶領前往並卽將器械盤費等妥爲備辦編隊起程俟到京時再行加恩賞賜前往軍營以資剿辦毋得遲緩

上又命軍機大臣傳諭胡季堂曰前次諭令盛京挑選健壯兵丁二千名於本月初十日前後可以陸續到京現又於吉林黑龍江各調兵一千名亦令赴楚協剿此項兵丁行走迅速所有經過直隸應

備車輛飯食等事著該督卽通飭所屬一律先期  
備辦以便到站過行毋令在途等候至兵丁等經  
過沿途理宜安靜行走並著該督察看帶兵各員  
是否能約束兵丁在途不至騷擾之處據實覆奏  
上又命軍機大臣傳諭吳熊光曰前經降旨令各省  
挑補兵額因河南省存兵有八千餘名又從前奏  
准暫募新兵五千名爲數較多是以未經議補今

思該省與陝楚兩省境壤毗連之處甚多現在川  
省李淑等股賊匪竄赴湖北鄖陽一帶而在陝之  
張漢潮一股時常窺伺豫境冀圖假道河南竄回  
襄陽是豫省之東西南三面應行防堵之處不一  
而足必須兵數充盈方足以資調遣著吳熊光卽  
刻查明現在該省實存兵數若干缺額若干照數  
於鄉勇內挑補足額旣足以敷應用而壯聲威且

一經入伍加之部勒更少游食滋事之徒實爲兩  
得至該省各路防堵情刑襄陽爲賊匪起事之處  
最關緊要不但將南岸船筏提赴北岸並須時刻  
偵探賊蹤嚴爲防堵其張漢潮一股亦應防其竄  
回商雒而李淑等股在南漳一帶滋擾毗近襄陽  
與豫境緊接均應防其竄逸吳熊光務宜督率將  
弁於各要隘處所嚴密堵禦勿令陝楚股匪一名

闖入再本日倭什布奏山西頭起兵丁於月初已  
入楚境山西兵丁久經檄調並諭令吳熊光妥爲  
照料過行此時湖北亟需兵力而此項新兵頭起  
於月初始入楚境行走未免延緩著吳熊光卽飛  
飭沿途各屬將應備車輛等項妥爲備辦俾後起  
兵丁迅卽赴楚勿再稍有濡遲現在盛京兵二千  
名日內亦將次到京今又於吉林黑龍江各調兵



一千名陸續赴楚吳熊光務須先期籌備令各項兵丁到境遄行毋致在途等候況此項調派之兵雖赴楚應用皆係保障豫省是爲楚卽以爲豫吳熊光當深明此意也

初七日癸巳魁倫奏言臣仰蒙

恩命署理四川總督於七月十八日起程初一日行至祁縣遇見廣興面詢川省軍營情形據稱現

在兵餉爲第一要務該處兵丁有兩三月餉銀

未經給領者該兵丁等衣履不備臣聞之不勝

駭異前此屢發帑金數逾千萬卽廣興解往之

項亦甫經數月何以不敷支給臣先於三十日

行至王湖地方見山西撫臣伯麟卽云近日勒

保奏請撥餉五百萬兩先向山西借撥四十萬

兩是該處軍糈不足似屬實在情形臣卽囑其

一奉

諭旨迅速起解趕赴川省臣亦擬於過陝時面諭沿

途地方文武迅行接遞護送以應急需至於棧

道一帶昨據廣興言及尚有賊匪出沒道路時

通時梗臣現擬至西安探聽的確如尚有賊匪

蹤跡就近與慶成永保商酌預行派撥官兵以

備護解餉銀速進並察看陝省興安一帶情形

該處有永保恒瑞等帶兵搜剿慶成如可分身

臣卽與之同赴川省倘一時慶成不能赴川

臣

亦同慶成商酌量帶兵勇一面搜捕竄伏匪徒

一面遊行取道徑赴達州接印至明亮現在是

否追捕逸匪已向鄭西抑或折回山陽商州之

處未得實信統容抵西安後探聽得實一切欽

遵

諭旨辦理奏入

上命軍機大臣傳諭魁倫曰據稱廣興告知川省兵丁有兩三月餉銀未經給領者兵丁等衣履不備該省軍需節經撥帑數逾千萬此次廣興所解之二百五十萬兩到川未及數月何至不敷支給卽形匱乏其故殊不可解向來軍營積弊任意虛糜帑項甚至餽送權門及私運回京自肥囊橐朕素

所深知今辦理諸務力加振頓斷無復有賄賂權  
貴之事而私運回京者恐尙未能盡絕廣興所見

軍營情事自因勒保發給軍餉未能公平所致况  
兵丁竟至衣履不周其不體恤士卒已可概見並

恐與福寧等尙有別項情弊魁倫平日辦事尙能  
認真素有廉名到川後務卽詳細訪查勒保支發  
餉銀是否均勻或係耳目未能周察之處兵丁等

不免向隅抑或任意愛憎於親隨者濫行賞給其  
餘視同膜外一任偏枯甚或竟與福寧等有營私  
肥己之事均須徹底查辦魁倫竟須大破情面仿  
照伊在閩省辦理虧空之案據實嚴叅不得稍有  
瞻徇至廣興所解二百五十萬兩昨據林儁奏先  
將舖戶借墊之六萬兩卽行給還尙有二百四十  
餘萬兩究竟作何支用魁倫務宜密訪嚴查將應

行叅辦者一面叅奏一面將該處軍營情形通盤  
核算現在實需銀若干迅速奏聞撥往接濟亦不  
可心存惜費致誤軍行或在該省騰挪辦理累及  
民間別生事故則更非朕意也再勒保自任經畧  
以來總未移營寸步大負委任並著魁倫察訪勒  
保此半年中於達州附近地方曾否有一二次遇  
見賊匪親行剿辦之處抑或一無所事安坐半年



一併據實具奏

初八日

甲午

上諭內閣曰現在調派盛京兵二千名復調吉林黑龍江兵丁各一千名前赴湖北鄖陽一帶協剿賊匪所有經過直隸省自山海關入境至磁州出境沿途州縣本年應徵錢糧著加恩蠲免十分之三至豫省地方從前所調山西兵三千名及此次調

往之東三省兵均由該省行走所有沿途州縣本  
年應徵錢糧著加恩蠲免十分之五以示朕軫念  
民依至意

上又命軍機大臣傳諭吳熊光曰現因添調盛京吉  
林黑龍江官兵並前此所調山西兵俱由豫省行  
走前後過兵七千名一切供頓事宜皆由地方備  
辦業經降旨將豫省過兵地方蠲免錢糧十分之

五從前教匪滋事卽因請派湖南協剿苗匪官兵  
經過湖北地方該州縣等經理不善輒藉夫馬供  
應擾累民間以致釀成事端此次所調盛京等處  
官兵沿途行走雖已飭令帶兵各員嚴行管束而  
程頓夫馬究不免繹騷之煩但借資民力一節若  
於恩旨內寫入恐不肖官吏藉有明文更復公然  
派累是以未經明諭吳熊光不可不善體此意愛

惜民力並將蠲免恩旨刊刻謄黃徧行曉諭此時  
將屆開徵該撫務須督飭所屬實力奉行俾沾實  
惠毋使吏胥中飽現在所調山西兵頭起已入楚  
境而盛京官兵卽日到京其吉林黑龍江兵丁亦  
當接續前往吳熊光尤宜將續調勁旅新兵預行  
宣布以期先聲奪人安民心而寒賊膽至該省防  
江事宜前據吳熊光等奏已將南岸船筏提赴北

岸固屬備禦之一策但從前景安在湖北時亦曾  
如此辦理而賊匪仍由襄陽偷渡擾及南陽並未  
能阻其來路况沿江船隻即使盡提北岸而賊匪  
將民房拆毀紮筏亦可徑渡此時江水盛漲稍有  
關攔一遇水落之時并可涉淺淌渡且或從上游  
乘流而下又安能處處隄防是提船北岸亦未可  
盡恃總在沿江水淺處所堵禦嚴密方不至有疎

虞昨已諭令吳熊光查明缺額兵丁照數挑補務須將此項新兵勤加訓練並卽令於江岸要隘處所分佈嚴防庶可得力再新調盛京吉林黑龍江官兵赴楚均須乘用馬匹前據勒保奏已札商松筠於陝甘各營內挑派健馬三千匹但祇足供盛京官兵之用况相隔甚遠而續調之吉林黑龍江官兵尙須預爲籌備陝省已調派三千自無多餘

馬匹從前曾將察哈爾出青馬匹調派八千前赴  
軍營因程途較遠畏養失時到彼已多疲乏不能  
得力今豫省距楚甚近預備乘騎自屬便捷著吳  
熊光卽於該省各營內酌量抽調善爲牧飼俟續  
調兵到卽可乘騎其各營抽調馬匹可得若干並  
著卽行具奏以便於察哈爾照數調往補額也